


Campaña contra e malesa di dengue pa 2013 a cuminsa

ORANJESTAD-- Departamento di Salud Publico Aruba (DESPA) kier a recorda pueblo di Aruba cu e siman aki DESPA a cuminsa cu e campaña “Sin criadero no tin sangura, sin sangura no tin dengue”. Esaki ta importante pa no duna e sangura *Aedes aegypti* e oportunidad pa reproducí su mes. DESPA su enfoka ta pa duna mas informacion tocante e malesa di Dengue su efectonan, kico pa haci na e momento cu haya dengue, pero mas importante con pa preveni dengue.

E maneranan con pa preveni dengue ta por ehempel: bentando den bari di sushi boter bashi y tur otro desperdicio cu por wanta awa. Tambe basha awa afo para den e scoter bou di e pochinan di mata, awa cu ta para den garetia of otro obheto y baki sushi cu tin awa den nan. Semper cu awa keda para den un obheto, basha e awa afo, frega e obheto bon cu habon y despues seca e bon.



Ademas ta importante pa pone e obhetonan na un manera cu e no ta yena cu awa. Paden di cas tambe por tin criadero: por ehempel cambia e awa di e vaas cu flor of stek di mata cada pasa un dia. Controla bou di frishider si tin awa den e baki, si esaki ta e caso haci

e baki limpi dos biaha pa siman. Tambe si tin otro obheto cu awa den cas, benta esaki afo y haci e obheto aki limpi regularmente.

Dengue ta un malesa cu ta wordo transmiti primordialmente pa e sangura *Aedes*



aegypti. Abo ta wordo contagia pa e malesa ora cu un sangura pica bo cu ya caba a pica otro persona cu e malesa. E sangura *Aedes aegypti* ta cuminsa broei den awa cu a keda mas cu dos dia para. E sangura femenino ta biba mas o menos 30 dia y por pone 100 webo cada biaha. E webonan cu no kibra of no a wordo elimina por keda bon pa 1 aña sin awa. Cu otro palabra pa esey ta importante pa elimina tur e webonan paso si un tiki awa cay riba nan, nan ta desaroya y bira un sangura adulto: *Aedes aegypti*. Ta e

sangura aki - cu ta carga un di e cuater tipo di virus - cu ta transmiti y causa e malesa dengue.

Ta pa esey cu DESPA, GKMB y seccion Malesanan Contagioso (DBZ) kier a invita e pueblo di Aruba pa subi e pagina di internet di dengue (www.dengue.aw) pa haya mas informacion pa yuda combati e criaderonan. Sin criadero e sanguranan no por broei. Tambe e pagina website ta duna tip di kico bo mester haci pa no wordo afecta y kico pa haci si bo a wordo afecta cu malesa di dengue. E pagina website aki tin informacion completo, tambe tocante e malesa su sintomanan y mas sugerencia pa prevencion.

Pa mas informacion por subi riba e website of por yama Departamento di Salud Publico Aruba (DESPA) of Seccion Malesanan Contagioso (DBZ) na 522-4200 of Gele Koorts Muskiet Bestrijding (GKMB) na 585-3325 / 585-5533. □